


TEZĂUR LITURGIC

30 MARTIE

ACATISTUL SF. IERARH SOFRONIE, EPISCOPUL IRKUSTULUI



MOSCOVA, 2000



Акафист

святителю Софронию, епископу Иркутскому

Кондак 1

Возбранный Воеводо, Творец веков, Господь, Царь Славы, глубиною мудрости помышляя полезное в роды родов о Церкви Своей, видевав наше маловерие, греховный сон и охлаждение, чудес действо сугубо даде по сгорении мощей угоднику своему, сим показуя велие дерзновение его ко Господу, да вси люди страны сибирския возгорающеся, верою и любовью, воспоют новому чудотворцу и цельбоподателю и молитвеннику своему, от всяких бед свободи ны, отче, зовущия Ти:

Радуйся, Софроние, горящий к Богу огнем любви неугасимыя.

Икос 1

Ангелов Творец, Господь Вседержитель благодатию Своею возвышая человеки в первое достоинство на небеси, избра ты, отче Софроние,

да служиши Ему во ангельском чину и монашествуеши на земли. Мы же воспоминающе юность и подвиги твоя глаголем сице:

Радуйся, духовных родителей духовное чадо;
радуйся, от юности положивый доброе начало.

Радуйся, носяй имя соименно перводиакону Стефану;

радуйся, сподобивыйся слышати небесный глас во храме.

Радуйся, премудрости Божией сын возлюбленный;

радуйся, в пострижении Софронием нареченный.

Радуйся, еще юн сый, бывый монахов наставниче;

радуйся, отче любвеобильный и строгий подвижниче.

Радуйся, Софроние, горящий к Богу огнем любви неугасимыя.

Кондак 2

Видя Елизавета, венчанная Царице,
благонравие твое и святость жития, изволением
Божиим избра тя в предстоятеля Лавры
Невския, да якоже славил еси Бога на юге
России, тако и на севере, в стольном граде,
научиши монахи и бельцы непрестанно пети
Богу ангельскую песнь: Аллилуиа.

Икос 2

Разум, от премудрости Божией дарованный,
не можаше укрытися в тебе, но яко пресветлая
звезда возсия на высоте архиерейства и
учительства, озаряя всю страну пространная
Сибири учением своим, внушая верным чадам
Церкви благодарственно вопити просветителю
своему:

Радуйся, святителю богоизбранный и
трудолюбивый;

радуйся, тя бо не устраши путь лишениями
многотрудный.

Радуйся, мы бо тя приемлем яко друга
Божия;

радуйся, имел бо и ты друга душе инока
праведна Синесия.

Радуйся, мужу желаний, благодати Божией носителю;

радуйся, архипастырю Иркутский, Иннокентия святого второй заместителю.

Радуйся, иерарше Богом избранный и людям благоприятный;

радуйся, от священнаго собора и от жителей града Иркутска радостно приятый.

Радуйся, Софроние, горящий к Богу огнем любви неугасимыя.

Кондак 3

Силою свыше облечен быв, святителю Софроние, обходя грады и веси паствы твоей, отечески наказуя клирики и иереи, да служат Богу со страхом, по достоинству сана своего, да учат дети, отцы и матери разумно пети небесную песнь: Аллилуиа.

Икос 3

Имея ревность по Бозе, яко же и пророк Илия, всякаго власть имущаго учил еси право ходити в законе Господни, правду и суд творити, заступати, немощныя, сирых и вдовиц

от напасти избавляти, к нищым милостивым
быти, за еже ублажающе тя, тако глаголем:

Радуйся, отче, правых путей любителю;
радуйся, злокозненных нравов искоренителю.
Радуйся, истин евангельских провозвестниче;
радуйся, злаго властелина усмирителю.

Радуйся, яко града Нерчинска первый быв
посетитель;

радуйся, своим служением оставивый память
чадам и родителям.

Радуйся, от сосуда сердца своего благодать
всем изливаяй;

радуйся, земли нерчинской небесное
благословение подаваяй.

Радуйся, Софроние, горящий к Богу огнем
любве неугасимыя.

Кондак 4

Бурю внутренних волнений не могий
стерпети, ревнителю благочестия, яко не
воздается честь благовестом Церковному
песнопению в Литургии, Вечерни и Утрени:
таже горя любовью ко славе Божией, повелел
еси на «Достойно», «Господи воззвах» и на

«Честнейшую» ударяти в кампан, да христiane в домех и на пути слышаше глас церкви, воспоют хвалу Богу: Аллилуиа.

Икос 4

Слышав речение Господне: «Иже сотворит и научит, сей велий наречется в Царствии Небеснем», делом слово исполняя: молитву, пост, поклоны и всяко томление плоти восприял еси, к сим же и человеколюбия не оставляя к меньшей братии, яко прежде кончины возмогл еси святость стяжати, за еже приими похвалу сию:

Радуйся, отче, любви ради Христовы земная оставивый;

радуйся, еяже ради вся красная ни вочтоже вменивый.

Радуйся, блаженство облобызавый нищеты духовныя;

радуйся, страхом Божиим попаливый страсти греховныя.

Радуйся, приявый иго Христова на рамена измлада;

радуйся, узким путем шествовавый неуклонно до вышняго града.

Радуйся, нетленных благ на небеси
обладателю;

радуйся, дивныя славы во светлости святых
созерцателю.

Радуйся, Софроние, горящий к Богу огнем
любве неугасимыя.

Кондак 5

Боготочною кровию, обновившему род
человеческий, Христу последовал еси, блаженне,
принося Ему бескровную жертву во оставление
грехов людей твоих, таже и всего себе принесл
еси во всесожжение, являясь источником
исцелений, бесов прогонитель и зритель таин
сердечных, возбуждая люди зрящия чудеса,
пети Богу: Аллилуиа.

Икос 5

Видевше сынове великия Сибирския
пречудное твое житие, аще и в последняя лета
возсиял еси в новопросвещенной стране, отче
Софроние, обаче древних отец сподобляясь
чести, равное дарование и чудес творение приял
еси от Бога, Его же благодаряще, тя величаем
приветствии сими:

Радуйся, иерарше, Николая Чудотворца
ревнителю;

радуйся, дивному Иннокентию верный
подражателю.

Радуйся, соседателю в вышних всем
святителем;

радуйся, и земных являясь от искушений
хранителем.

Радуйся, благочестие и веру соблюдый
нескверно;

радуйся, в венце славы предстоя свету
невечерню.

Радуйся, на свет явивыйся, егда Христос
родися;

радуйся, ты бо во светлыя дни Пасхи ко
Господу преставился.

Радуйся, Софроние, горящий к Богу огнем
любве неугасимыя.

Кондак 6

Проповедник бывый веры Христовы и
познания истины в монголах и во всяком языке
ближняя и дальняя Сибири, пришел еси и ко
своему пределу, еже есть земля еси и в землю

отыдеша, отдав дух Богу, тело же оставив верным на многа лета в пещере, да приходящие поют надгробную песнь: Аллилуиа.

Икос 6

Воссиявшее солнце в земли Иркутстей, Святый Софроний, в старости преклонней позна запад свой, оставив земная, восприял есть от руки Господни вечная благая, еже мы познахом от чудес и целебных силы, присущия святым мощем его, и удивляясь поем ему таковая:

Радуйся, пастырю, неусыпно пасый Христово стадо;

радуйся, надеждо ненадежных и сердечной туге отрадо.

Радуйся, ты бо отшел еси прияти венец славы;

радуйся, ибо оправдася на тебе суд Божией правды.

Радуйся, твоя бо душа вчинена есть в святителей лики;

радуйся, яко сице блаженство пребудет в бесконечные веки.

Радуйся, тело бо твое остася нетленно;

радуйся, яко чудо сие бысть всей Церкви Российской явленно.

Радуйся, Софроние, горящий к Богу огнем любви неугасимыя.

Кондак 7

Хотя Господь утешити избранныя люди своя, междоусобным искушением угнетенныя, волною неверия колеблемыя и вкупе с пастырми гонимыя, открыл есть славу угодника своего преблаженнаго Софрония, юже имать со святыми на небеси, да притекающе людие к его молитвенной помощи, поют Христу Богу: Аллилуиа.

Икос 7

Дивное знамение нача являтися у раки святых мощей твоих, отче преподобне. Уврачевал бо еси первее языкоболие, таже зубов возболение, таже и силу огневицы отрочат угасил еси, за еже благодарственно приносим ти песни сия:

Радуйся, врачу безмездный и
цельбоподателю;

Радуйся, помазанием елеа болезней
облегчителю.

Радуйся, изливая милость на книжных,
разумных и простых;

радуйся, обновляя веру искушением
колеблемых.

Радуйся, явлением своим от позорная смерти
избавляя;

радуйся, молитвою твоею и кони свирепыя
укрощая.

Радуйся, теплое утешение всех гонимых и
скорбящих;

радуйся, предстателю Господень за всех к
тебе прибегающих.

Радуйся, Софроние, горящий к Богу огнем
любве неугасимыя.

Кондак 8

Странно чудо, како части костей святых
мучеников источают исцеления, се ныне видим
кости святителя Софрония огнем изнурены, и от
нас грешных сокровенны, раны и вред врачуют,
и всяко томление души скорбящая на радость
предлагают. Воистину чудо преславно, сего ради
чудес дателю Богу поем: Аллилуиа.

Икос 8

Весь еси ты отче, водворяеши в вышних,
но и нижних, нас грешных, от скорби и от духа
уныния долу поникших не оставляеши, присно
бо притекающим к тебе помоществуеши, печаль
на радость и скудость на довольство
прелагаеши. За вся сия ты ублажающе, глаголем
сице:

Радуйся, источниче присный благодатных
исцелений;

радуйся, разрешаяй жен от тяжких
рождений.

Радуйся, умом изумленным разум
возвращаяй;

радуйся, явлением во сне изломление костей
исправляяй.

Радуйся, избавление от страха ночного
боязливый;

радуйся, прогонителю блудного беса и
подателю целомудрия.

Радуйся, оком твоим свыше на иноческие
обители призирающий;

радуйся, огненным столпом в возгорении, града мощи твоя показующий.

Радуйся, Софроние, горящий к Богу огнем любви неугасимыя.

Кондак 9

Всякий естества закон превосходит, еже ты твориши, о, великий Чудотворче! Изподспуда бо земнаго являясь, глаголеши избранным: «Прославите мя и аз вас прославлю» и повелеваеши, да сотворят ограждение над гробом твоим, да не попирается ногами место святое, но со страхом, ходяще людие окрест, поют: Аллилуиа.

Икос 9

Ветии многовещаннии неразумюще тайны Божией яже, о Софроние! Егда узреша дым запаления от святых мощей, велиим гласом, на стогнах града и в домех велемудренно кричаху православным: «Уа! Где есть вера ваша? Где святость? Где мощи? Аще Софроний бе свят, почто не противися огню?» И ругахуся вере Христовой. Таже видевше множество чудес паче прежняго, познаша яко Бог поругаем не бывает: зазираху себе, возжигаху свечи, припадаху к

честным останкам святых мощей, бияху в перси
своя и в глубоцем молчании, сердцем вопияху:

Радуйся, Софроние, чудес делателю
новоявленный;

радуйся, подавай прощение в покаянии
просящим смиренно.

Радуйся, имей власть вязати и решить;

радуйся, и мощем своим ниспославый
множайшую силу благодати.

Радуйся, огнепальным действием лику
сочетавайся священномучеников;

радуйся, отче милостивый, вразумителю
мощей твоих хульников.

Радуйся, ограждая паству твою от
диавольских умышлений:

радуйся, подателю благословения в начале
добрых начинаний.

Радуйся, Софроние, горящий к Богу огнем
любве неугасимыя.

Кондак 10

Спасти хотя град свой от кровопролитных
брани, миротворный отче, явился еси
прославляющемуся ты сопрестольнику твоему

архипастырю Иоанну: «Мужайся» рекл еси ему. Также и прежде явлейся, показуя гроб свой и глаголя: «гроб сей ветхий, нетребен ми еси», еже знаменова самоприношение в умилоствительную жертву о граде. Познати тайну сию Иоанн можаше. Егда сбытся реченное, он и вся люди со умилением воспеша хвалу Богу: Аллилуиа.

Икос 10

Стена каменна прямо, стена одесную, стена ошуюю в пещере, идеже бо хранимо тело твое, Угодниче Христов, яко несть возможно проникнути тамо пламени. Обаче Христос Господь, премудростию своею устрояя полезное церкви, попустил есть, да сгорит гроб твой и тело твое, показуя сим, яко догмат Святаго Православия несть чувственное и осязаемое, но сердечною верою постигаемое и надеждою возмогаемое, и пети тебе любовь научающее:

Радуйся, мысленный изъяснителю православия;

радуйся, смотрительно предавый мощи своя на сожжение.

Радуйся, венцем священномученика
украшивъйся по преставлении;

радуйся, кротчайший отче, никого же
обличивый в запалении.

Радуйся, правды Божией и премудрости
честное орудие;

радуйся, предваривый Иоанну во сне быти
имущее.

Радуйся, яко по сгорении усугубивый
чудодействия;

радуйся, сими бо чудеса возвеселишася люди
Иркутска.

Радуйся, Софроние, горящий к Богу огнем
любве неугасимыя.

Кондак 11

Пение всеумиленное и горячую молитву
вознесл еси к Богу в годину междоусобныхъ
брани о граде твоём, великий наш заступниче,
яко ни единому гласу оружному слышатися во
граде в день прославления твоего, и тако
священный собор и множество верныхъ
возмогша в мирной тишине воспети тебе хвалу
и Богу: Аллилуиа.

Икос 11

Светильника Церкви – третьего епископа Иркутского – устрои тя Бог, в триех Ипостасех славимый, богоблаженне Софроние. Всесвятый же Дух, Бог Всемогущий, всепремудрый, самовладычный, самоповелительный исполнил есть тя духа премудрости, духа разума, духа страха Божия: да сими дарами Духа Святаго приведеша люди ко спасению, вопиюща ти:

Радуйся, вместилище даров Духа Святаго;

радуйся, очистилище человеческого злого нрава.

Радуйся, от страсти пьянственных людей свободяя;

радуйся, от боли главы, зубов и желудка избавляя.

Радуйся, течение крови и воды яже в теле прикосновением уставляя;

радуйся, и срачицею возложенною на гроб твой, здравие подавая.

Радуйся, устраяя бедствующим жилища к пребыванию;

радуйся, неимущим, где главу подклонити
кров дающий и пропитание.

Радуйся, Софроние, горящий к Богу огнем
любве неугасимыя.

Кондак 12

Благодать, данную ти от Бога ведуще
прилежно просим тя, отче Софроние, пролей
ныне теплую твою молитву о нас ко Господу, да
презрев вся наша согрешения, дарует нам
мирное житие, друг ко другу любве исполненное.
Грады и Церкви не разоримы да сохранит,
обилие всяких плодов земли да дарует, и всех
нас да спасет и помилует: мы же благодарным
сердцем воспоем ему: Аллилуиа.

Икос 12

Поюще дивнаго во святых своих, Царя
Небеснаго, прославльшаго тя, вернаго раба
Своего, милостивое твое скорое нам во всяких
нуждах поможение, прославляем и Бога
благодаряще, радостно ти глаголем:

Радуйся, великославный Сибирский
заступниче;

радуйся, совершенный в добродетелех
человече.

Радуйся, подражателю святых и священномучеников;

радуйся, благий и добрый наставниче иноков.

Радуйся, Пресвятая Богородицы известный умилолюбивителю;

радуйся, молитвенниче за град наш и вся страны покровителю.

Радуйся, света Евангельского всесветлое сияние;

радуйся, во тьме греховней сущим просвещающее озарение.

Радуйся, Софроние, горящий к Богу огнем любви неугасимый.

Кондак 13

О, чудотворче преславный и заступниче наш, богомудре Софроние, прими малое сие моление наше, якоже Христос приял вдовицы две лепты и богоприятным твоим ходатайством умоли Господа сил силу свыше нам подати на исправление жития, да Того благодатию от грехов очистившимся, геенны избавитися и грядущия на небесех благая улучшить, вопиющим Ему: Аллилуиа.

(Этот кондак читается трижды, затем икос 1 и кондак 1)

Молитва первая

Святителю Христов Софроние! Предстоя у престола Божия, призри с небесе на нас, грешных и недостойных раб Божиих (имена)! Возгрей сердца немощных людей и призови к покаянию и исправлению жизни греховныя. Утверди нас твоею благодатною помощью, предстательством твоим и молитвами приход сей от всякого зла и навета вражия огради, спаси и сохрани именем Господа Бога и Спаса нашего Иисуса Христа, Ему же славу приносим во веки. Аминь.

Молитва вторая

Святче Божий, святителю Христов, добрый пастырю словеснаго стада, человече Божий, новый чудотворче и неусыпный к Богу молитвенниче за страну сию, отче Софроние, призри с высоты Небесныя на нас, с верою и любовью покланяющихся образу твоему и честным останкам святых мощей, в наше утешение избывшим от всепожаряющего огня. Призри, святче Божий, и виждь наше

нестроение и раздоры, нашу тугу, скорбь и сердечную болезнь, от лишения братския любви пребывающия. Испроси у Христа Бога коемуждо нам благодати смирения, познание своея греховности и самоукорения, да, внимающе кийждо своей совести, престанем осуждати ближняго, клеветати и поношати, но, соединившися ко друг другу любовью, сподобимся мирно во смирении прочее время живота нашего пожити и улучшить христианскую кончину. Да, совокупльшися в будущей жизни со всеми святыми и с тобою, пастырю наш, прославим Единого в Троице славимаго Бога, Отца и Сына и Святаго Духа во веки веков. Аминь.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО